

BONERIANO®

EDITOR:
Bonaire Communication Services N.V.

Djasabra 23 yüli 2022 | Preis: \$1.00

VAN HUFFELEN MESTER PIDI RIJNA ESKÜS

Orkidia tur na flor den naturalesa



E dianan aki e orkidianan riba Ruta Wayaká ta kargá di flor. E flornan aki ta blanku. Pero tin tambe orkidia ku flor püs. Hopi bunita. E flornan ta keda basta dia.

Rosales ta baha

Página: 3

CHANGAN AUTO



CS55

f /dabboussimotors



Covid-19 plamando ketu bai na Boneiru

KRALENDIJK -- E vírus ku ta kousa Covid-19 ketu bai ta plamando rònt Boneiru. E kantidat di tèstnan di Covid-19 ku a sali positivo den siman di 11 - 17 yüli, ta e kantidat di mas haltu for di mei 2022. Un persona a keda hospitalisá pa motibu di Covid-19.

Ta importante pa tuma e angua kontra Corona i esun di buster, pa evitá ku ta bira hopi malu di Covid-19. Tur siman tin posibilidat

pa bakuná pòrnada. Riba e wèpsait di Entidat Públiko Boneiru www.bonairegov.com tin un página speshal ku informashon tokante Covid-19. Einan por haña sa e ora i sitio pa por tuma e bakuna.

Ta importante pa tene bista riba e manera ku Covid-19 ta plama na Boneiru. Asin'ei por tuma medida si ta nesario pa protehá esnan mas vulnerabel den nos komunidad. Hasiendo esei

ta tene kuido aksesibel pa tur hende. Tur ku tin síntoma por hasi un PCR tèst pòrnada via di departamentu di Salubridat Públiko (basta a hasi un 'zelftest' antigéniko ku a sali positivo promé)

Pa pregunta i pa traha un sita pa tèst yama departamentu di Salubridat Públiko 0800-0800.

Por haña un splikashon amplio tokante sifranan di Covid-19 na Boneiru riba

e página di wèp <https://bonairegov.com/pa/habitante/>

informashon-aktual-di-siman-covid-19

GRADISIMENTU


Yunan di e defuntu

Pedro Columbio Makaai

mihó konosi komo Unchi eks-kapitan di Niagara



kier a gradisi tur famia, amigui konosinan ku a mustra atenshon na ora di entiero di nan kerido defuntu.



Orario Botika Rincon adaptá

KRALENDIJK -- Debí na sirkunstansia imprevisto, Botika Rincon ta sirbi pueblo di Boneiru na orario adaptá te ku próksimo aviso. Djabièrnè e botika tabata será. For di otro siman

djaluna Botika Rincon ta habri su porta pa sirbi pueblo di Boneiru atrobe, pero na orario adaptá, di 8'or di mainta pa 12'or di mèrdia. Botika Rincon ta pidi diskulpa pa e inkumbiniensia

ku e adaptashon di orario di servisio akí por trese kuné pa su klientenan. Loke ku sí ta keda meskos, ta e servisio amabel i ku dedikashon ku semper por konta kuné ora bishitá Botika Rincon.

Dos kòntainer riba otro



No ta kustumber pa mira dos kòntainer riba otro riba e barku Doña Luisa 1. Esaki pa e motibu ku no tin posibilidat pa deskargá e barku na Boneiru. Korektamente bisá, no tin un instalashon di kran, ku ta karga òf deskarga e kòntainernan riba waf i barku. Potrèt saká djárason atardi, miéntras e barku Doña Luisa 1 tabata mara na Waf Nello Craane.



mr. Kenneth F. Arends & Partners
Notaris Bonaire

EXECUTORIALE VERKOOP/FINDISHI krachtens artikel 3:268 Burgerlijk Wetboek BES

Ten overstaan en ten kantore van **mr. Kenneth F. Arends, notaris te Bonaire**, dan wel zijn waarnemer casu quo ambtsopvolger, zal op **woensdag 24 augustus 2022** **aanvang om 10:00 uur in de ochtend** aan **Kaya Libertador Simon Bolivar 5 te Bonaire** de openbare verkoop plaatsvinden van het navolgend registergoed, alsmede al hetgeen verder daartoe door aard, bestemming of natrekking behoort, daaronder mede begrepen de verpande roerende zaken als bedoeld in artikel 3:254 van het Burgerlijk Wetboek BES:

een perceel grond met het daarop gebouwde en verder aan- en toebehoren, gelegen te Noord Saliña op Bonaire, kadastraal bekend als **Afdeling 4, Sectie D, Nummer 15**, groot **achthonderdvijftien vierkante meter (815m²)** en al hetgeen verder daartoe door aard, bestemming of natrekking behoort, plaatselijk bekend als **Kaya Caribe 27**.

De verkoop zal plaatsvinden in één zitting bij opbod en afslag; opbod en afslag worden na elkaar in één zitting gehouden zoals vermeld in de veilingvoorwaarden; deze veilingvoorwaarden liggen tenminste 8 dagen voor de veiling ter inzage ten kantore van mr. Kenneth F. Arends, notaris te Bonaire.

Gebruik:

Indien het registergoed niet vrij van gebruik wordt opgeleverd, dient de koper zelf voor ontruiming zorg te dragen al dan niet uit kracht van de grosse van het procesverbaal van veiling, akte van gunning en kwijting. Ontruiming komt geheel voor rekening en risico van de koper.

Onderhandse bidingen:

Gegadigden kunnen tot veertien (14) dagen vóór de verkoop een **onderhands schriftelijk en onvoorwaardelijk bod uitbrengen middels een aan de notaris gericht geschrift**. Bidingen zullen worden behandeld conform artikel 3:268 lid 2 van het Burgerlijk Wetboek BES, zonder dat de executant gehouden is op een biding in te gaan.

Bieders:

Iedereieder koper is gehouden terstond een bankgarantie of andere vorm van zekerheid te stellen tot nakoming van zijn bod en de bijkomende kosten. Iedereieder koper is eveneens gehouden zijn/haar geldig legitimatiebewijs bij zich te hebben.

De executant behoudt zich het recht voor de veiling uit te stellen en op te houden, zonder de verplichting daarvoor de reden(en) op te geven.

Nadere inlichtingen zijn verkrijgbaar bij:

mr. Kenneth F. Arends & Partners

Kaya Libertador Simon Bolivar 5 Bonaire

telefoonnummer + 599 717 16 19,

faxnummer + 599 717 1620,

e-mailadressen: kenneth@notarisarends.com en/of info@notarisarends.com

E sekretario di estado a informá Parlamento inkorekto

VAN HUFFELEN MESTER PIDI RIJNA ESKÜS

KRALENDIJK – Frakshon di PVV den Tweede Kamer ta haña ku Sekretario di Estado di relashon di Reino, Alexandra van Huffelen, mester pidi gezaghebber Edison Rijna esküs públikamente. Esaki a sali na kla for di preguntanan por eskrito ku lider polítiko di PVV, Geert Wilders i boso di relashon di Reino, Machiel de Graaf, a hasi e mandatario.

Indikashon ta ku van Huffelen ku su ekspreshon durante e debate ku gezaghebbernan por vota riba desishonnan di Kolegio Ehekutivo sí nan ta deseá, a informá Parlamento inkorekto. E lei entidatnan públiko BES no ta laga e eskoho na e gezaghebbernan, pero ta obligá nan netamente pa partisipá na votashon.

Dor ku e sekretario di estado a informá Parlamento inkorekto, seguidamente Tweede Kamer a aseptá un

moshon ku ta indeseabel ku gezaghebbernan por vota pa temanan delikado manera otorgamentu di pèrmit i kambio di plannan di destinashon. Na Boneiru entre otro oposishon, media i komentadónan riba media sosial, a usa e moshon pa reprochá Rijna di no a atendé íntegro dor di partisipá na e votashon.

Wilders i de Graaf ke sa di van Huffelen ku e ta haña su mes tokante abilidadat di lesamentu sufisiente pa por lesa WolBES komprehensiblemente i por rekonosé e diferensia entre e noshonnan ‘obligá’ i ‘e posibilidadat’. I sí akaso e kontesta ta afirmativo, kon e mandatario ta kualifiká e ora ei e echo ku el a informá Parlamento robes.

E parlamentarionan ta puntra tambe sí van Huffelen ta dispuesto pa pidi esküs públikamente na e gezaghebber boneriano i ku esaki rekuperá e reputashon



Geert Wilders di PVV.

serio hasí.

Serka e direkshon di relashon di Reino di e ministerio di BZK, ya pronto despues di e debate a konstatá ku e moveshon di e sekretario di estado ku gezaghebbernan tin eskoho liber i pues no tin obligashon di voto, ta pará kontra lei. Pero te ku awor, manera usual pa tipo di kasonan asina, un karta

den kua e ta korigí su palabrashon, a keda afó.

Parlamentarionan Lammer van Raan di Partij voor de Dieren, kendeuntu ku Jorien Wuite di D66 i Sylvana Simons di BIJ1, ku a entregá e moshon, a laga sa ku lo hasi pregunta

serka BZK, “pasobra sí mi ta sintá na banda, mi ke sa esaki tambe i mi ta e promé pa atmití esaki.”

PVV ta e úniko di e 20 frakshonnan dn Tweede Kamer ku a vota kontra di e moshon, indikando ku ta atendiendo kontra lei.

Mal ehèmpel

KRALENDIJK – Un siudadano atento moviendo den sentro di Kralendijk, a tuma nota djabièrnè mainta di un outo di servisio numerá D-138 pertenesé na Koninklijke Marechaussee (KMar), stashoná riba asera na entrada di Centrumgebied.

Ta trata aki di dos agente di KMar Hulandes Oropeo, ku a disidí pa stashoná e vehíkulo riba asera i simplemente kana drenta i kumpra kos na Subway.

E siudadano ta puntranan mes: “Ki tipo di ehèmpel esaki ta, pasobra ta Hulandes Oropeo nan si por.”



Rosales ta baha

KRALENDIJK -- Riba 12 di yanüari 2023 e hefe di Kuerpo Polisial Hulanda Karibense, Jose Rosales, despues di a ehersé e funshon di hefe di kuerpo pa 6 aña, ta baha for di e funshon. Esaki riba su mes pe-

tishon i den bon konsulta ku e ‘Korpsbeheerder’.

Rosales lo kontinuá pa algun aña komo konsehero di kolegio di hefenan di kuerpo i lo tei pa risibí i prepará e hefe nobo di kuerpo.

Ta bai publiká e vaka-

tura pa hefe di kuerpo nobo di Kuerpo Polisial Hulanda Karibense na komienso di ougùstùs 2022.

Rosales lo sigui ehersé su funshon ku hopi amor i dedikashon pa kuerpo i komunidad di tantu Boneiru, Saba i St. Eustatius.



Detenshon pa insulto

KRALENDIJK -- Den oranan di mardugá di djabièrnè 22 di yüli, Polis a detené e hòmber di inisial I.N.M.P. di 39 aña di edat. Un patruya a nota e sospechoso ta manehá su outo sin lus sendé i a par’é pa atendé kuné tokante

esaki.

E sospechoso a reashoná di manera fresku, a insultá e agentenan i a kore bai. E agentenan a sigui su tras i duna òrdu pa para. El a neglighá esaki. Na un kas kaminda el a bin para, a deten’é.



R.K. Schoolbestuur Bonaire
ta partisipá fayerimentu di

sr. Rudolf Thomas

tata di nos maestra **Monique Thomas**
suegro di nos maestra **Sharon Thomas-Waal**

Nos ta deseá Monique, Sharon i demas famia hopi forsa ku e perdida grandi aki.

Ku su alma sosegá na pas.

Entiero ta tuma lugá djamars 26 yüli 2022

Semi-dokumental 'Sitionan Marká' ta kontinua

KRALENDIJK-- Danki na tur bon reakshon riba e semi-dokumental ku Frans Booi, tokante di e sitionan historiko, 'Sitionan Marká', na Bonaire. Dos siman pasá den di 5 episodio nos por a mira e programa tokante di Sitio Mampariakutu, tende di shete koló. Hopi interesante hañando informashon tokante di e parti suit na

kosta di Boneiru.

E wikènt aki Frans ta konta den e episodio 6 di dos kueba i sitio iopi interesante banda di otro.

E promé parti ta e sitio Mati Mati, sitio místiko, pariba di Marka Indjan, kaminda nos lo siña hopi di nos luna, streanan, pues tokante astronomia; e kueba ku un buraku den e dak di




kueba, ku ta permití lus di solo pasá, pakiko e ta tapá parsialmente ku un piedra, i kiko ta selebrá einan; kon liñanan ta kore riba e sitio, na unda nan ta bai.

Den di dos parti un sitio Hopi bishitá pa turistanan i lokalnan, esta Marka Indjan ku pinturanan den e plafòntdi e kueba. Ki konekshon tin ku e baranka

Turtuga Kayena... i ku mas liña ku ta krusa Boneiru.

Hopi kos nos lo siña di Frans Booi ku ta yuda nos pa ora nos bishitá e sitio aki. Pues sufisiente motibu pa no pèrdè e seri 'Sitionan Marká'. Kada dos siman ta pasa un episodio nobo, kuminsando riba djabièrnè 12or di merdia, ta ripiti mei anochi, djasabra 4'or atardi, djadumingu 8'or anochi i djaluna 8'or di mainta.



Boneiru su burikunan ta keda un atrakshon

KRALENDIJK – E burikunan ku ta move na Boneiru, ku ta bibá alrededor di 500 aña kaba riba e isla aki, berdaderamente ta un atrakshon pa nan forma di ser. Nan ta amabel i ta apresia ora ku bo duna nan awa i kuminda.

Resientemente un grupo

chikitu di Ministerio Públiko ku a hasi un rekorido edukativo i informativo na algun serio di Boneiru, bou di guia di Bòl Antoin di FuHiKuBo, a entretené nan mes amenamente ku algun buriku ku ta permanesé den besindario di Flor di Cuba, pa motibu di presensia di

awa na e sitio aki. Tin un molina ku ta pòmp awa di bon kalidat den e bakinan grandi na e sitio.

Ne bakinan aki tin kranchi ku por habri e laga awa bai na bakinan mas chikitu pa kabritu i buriku haña awa.



Captain Don's Habitat "the home of diving freedom" with 46 years of diving experience has evolved into a world renowned resort catering to today's most demanding diver, business and leisure travelers. Set amidst lush green gardens with colorful decor and landscaping we now offer the comfort of 6 deluxe varieties of accommodations, fresh water pool, great dining and entertainment options, friendly service, and of course the best house reef for diving and snorkeling in the Caribbean 24 hours per day, 365 days per year.

To make our team stronger we are looking for a Front Desk Clerk Housekeepers

Are you looking for a challenge? Please send your Application letter together with your Curriculum Vitae to: claire@habitatbonaire.com attention Mrs. Claire Sealy or feel free to pass by personally.

BròKèS 93.5 FM
Tono Positivo, Ritmo Dibertido

STUDIO Telefon & WhatsApp
+599 701 0935

Maneho General;
Djòni Leoneta +599 786 9091
Maneho amministrativo;
Ethel Leoneta +599 796 9133
email; 93.5boneiru@gmail.com

Skaché 'é
Radio BròKèS 93.5 Boneiru



N
E

Últimamente mi ta sinti mi un prinsesa den kushina. Mi ta eksperimentá na mi antoho. Mi kuminda ta sali bon. Mi famia ta duna mi kòmpliment despues di kada kuminda. E kos mas dushi ta, ora mi kasá bisa mi: "Mi ke un rònt mas." Pa mi no tin mihó kòmpliment ku esei.

Mi ta disfrutá di e logro aki. Si lesadó, pa ami, krea un bon plato ta un logro. Semper mi a 'struggle' den kushina. A pesar ku mi tabata hasi mi bèst, e resultado no tabata di 'gaba makamba'. Esaki a kambia. Awor mi por pone un bon stobá riba mesa. Mi ta asta kushiná aros den wea, mi no ta usa un 'rice cooker' mas. Ayera m'a kushiná 'sperzie-boon' stobá.

Mi a kompartí kuminda ku un amigu i un primu di mi kasá. Awèl, e wesunan so a keda komo testigunan silensioso. E primu di mi kasá a gaba mi abilidad den kushina. Tene kuenta ku e hòmber aki semper ta kla pa kritiká mi plato di kuminda. Ku un smail di oreá pa oreá m'a aseptá su kòmpliment.

Mayan ku Dios ke mi mester bai un atardi di gradisimentu. Esaki mi amiga i amigu a organisá. E intenshon ta pa nos nombra tur lokual nos ta gradisí p'e. Kada un di nos mester trese algu di kome i bebe i tambe un regalitu pa duna otro.

Ami ta den un 'vibe' kreativo pues mi ta traha pan di yerba. Mi ta usa rosamarein, konofló i teim. Tambe mi ke traha mi propio zeta mesklá ku yerba aromátiko. Mi ta usa zeta di oliva pa esaki. Mi a kumpra dos bòter masha bunita, ku lo mi yena ku e zeta aromátiko aki. Esaki lo ta mi regalitu pa mi amigu i amiga.

Mi tabatin intenshon pa bai buska palu ku ta drif, pa krea algun kos ku palabranan motivante. Mi a alegrá mi mes pensando ku lo mi kana na laman i piki palu. Pero esaki lo no sigui.

Mi kolega di Ret Karibense a kaba di manda un èp bisando ku pa awe nan ta ferwagt un artíkulo di mi. Alabes Boi Antoin a duna mi un tarea pa hasi. Mi ta premirá ku e úniko kos ku lo mi krea awe lo ta artíkulo.

Fòrki i kuchara di palu inferior

KRALENDIJK -- Manera ta konosí, no por importá fòrki i kuchara, tampoko kuchú di plèstik mas na Bo-



neiru. Esaki riba su mes no ta problema. Hopi hende no ta wòri ku e kambio, loke si ta kousando poko molèster, ta e fòrki i kuchara di palu di kalidat inferior.

Hopi inkonfortabel i no por gara kuminda fásil manera tabata e kaso den pasado ku esnan di plèstik. Tin hende ta bisa e kos aki ta fastioso òf nan tin ku sali kas ku nan fòrki di heru, pasobra kome ku esun di palu ta un desaster. Kisas ta

tuma tempu pa e hende siña kome ku esun di palu.

Loke por mira, ta ku esun di palu, spesialmente e fòrki, su djentenan ta ménos largu ku esun di plèstik i ta kibra lihé. Pues ta hopi difisil pa bora òf gara galiña i karni kuné. Kisas piská ta bai poko mas fásil.

Ta algun di e remarke nan ku ya ta sirkulá den komunidad tokante e kambio drástiko di fòrki di plèstik pa fòrki di palu.

Baki di kuminda nobo ta benifesiá bendedó di kuminda

KRALENDIJK -- Tin basta reklamo pa loke ta trata e baki nobo ku por pone entre otro kuminda aden. Ta konosí ku denter di poko ku no por importá, tampoko hasi uso di tayo, fòrki, kuchara, baki di fom, òf tur e tipo di kosnan di plèstik ku ta usa solamente un solo bia. Tin algun ku ya ta for di servisio.

Hende ta bisa, kuminda ta pega den e baki, ku ta un baki di karton. Batata hasá ta pega den bòm di e baki di karton i mester tene bon kuenta pa no kome e batata ku karton i tur. E por tin konsekuensia negativo pa e hende. Galiña tambe ta pega òf kima e karton.

Otro kos ku ta notabel di e baki di kuminda nobo di karton, ku ta remplasá e baki di fom, ta ku e ta ménos hundu. Pues esun di karton ta karga ménos kuminda, ku esun di fom. Bon mirá, e bendedó di kuminda a sali di bon den e kaso aki, esta di baki di fom pa esun di karton.

Pa pone riba dje, e baki di karton ta poko mas karu ku esun di fom, loke ta

pone ku preis di kuminda a subi, miéntas e kumpradó ta haña ménos kuminda pa e sèn. Un diferensia dòbel.

Hopi komentario tin den komunidad, pero un kos ta sigur, no ta bai bèk na e baki di fom, motibu ya konosí.



Programanan di Bonaire.tv

TELBO kanal 70
Flamingo TV kanal 23

Djasabra 23 yùli 2022

12.00 Herensia:	Lino de Palm
13.00 Aki Boneiru:	Toyán Frans
14.30 Herensia:	Macario Prudensia
16.00 Sitionan Marká:	Mati mati i marka indjan
17.00 Aki Boneiru:	Smeris
18.00 Herensia Korsou:	Jasinth Thielman
19.00 BAPA:	Roland Colastica

Djadumingu 24 yùli 2022

12.00 Herensia:	Marcello Valentin (Balentin) Frans
13.00 Aki Boneiru:	Kaminata historiko Rincon
15.30 Puerto Latino:	Luis Zárraga
16.00 Herensia:	Lino de Palm
17.00 Aki Boneiru:	Toyán Frans
18.30 Herensia:	Macario Prudensia

Tur mèrdia 12'or ta kuminsá un programashon nobo di 4 ora. E programashon aki ta ripití pa 24:00.

Firmamentu akuerdo i stipulashon

Fondo pa deporte i kultura

KRALENDIJK -- Djárason mèrdia diputado James Kroon i Adely Susana-Jansen, direktor interino di BHM, a firma un kombenio. Ta trata di akuerdo pa fondonan ku tin pa reparti den deporte, kultura i re-

modelashon.

Promé ku e firmamentu a tuma lugá, diputado Kroon a bisa ta despues di hopi trabou por firma awe e akuerdo di stipulashon pa por sigui e kaminda pa eheshon. Huntu ku Fun-

dashon Wegá di Number Boneiru (FWNB), ta bai hasi uso di e fondonan ku tin di 5 porshento. No a bai fásil pa yega na e punto aki. Huntu ku BOG ta bai ehikutá e trabounan. Fondonan ku FWNB ta hasi, ta bai pa deporte, obranan karikatibo i kultura.

E montante ta reparti den tres, 64 porshento pa deporte, 30 porshento pa kultura i 6 porshento pa remodelashon di diferente tereno i pista pa baskel entre otro.

Ya tin diferente trabou



ku ta hasi òf den proseso.

Pa loke ta trata kultura, e sèn ta bai pa Biblioteka nobo.

Pa loke ta trata e parti karikatibo, ta bai yuda renobashon na un sitio na Rincon.

Gobièrnu a bai di akuerdo pa e área kaminda e promé avion a baha na Boneiru, ku Boi Antoin ta atendé ku e parti aki, pa hasi loke ta e plannan pa e área. E sèn tei, pero e proseso a

kana poko poko. BOG ta bai atendé ku esaki. Di e manera aki komunidad por mira unda e sènnan ta bai.

Diputado Kroon: “Mi ta gradisí FWNB pa logra tur loke ta menshoná.

Ta trata di 4 mion dòler ku a akumulá durante 10 aña i Boneiru tin derecho riba dje.”

Despues a sigui ku e parti di firmamentu na enkargo di Adely Susana-Jansen i diputado James Kroon.

Lac nunca ta desapuntá

KRALENDIJK – Bahia di Lac nunca ta desapuntá. E tim di staf di Sea Turtle Conservation Center (STCB) i ku aporte ekselente di boluntario, su segundo siman di kaptura di turtuga den reda pa e aña aki, tabata briante. A kapturá, midi, pisa i marka 27 turtuga blanku i un turtuga karèt. Den e 38 turtuganan, tabata diferente ku ya a kaptura anteriormente. Rekapturá ta interesante pasobra por kompará data di historia atrobe ku data aktual. Ta usa esaki pa determiná kon e turtuga ta



desaroyá. Un ehèmpel ta e turtuga blanku ku por mira riba e foto ku ta kompañá e artikulo aki. Na 2016 a topa e turtuga aki tempu e tabata pisa solamente 5.8 kilo i tabatin un largura di 37 centimeter. Seis aña despues, e turtuga aki awor tin 47 kilo i tin un largura di 68.5 centimeter. STCB ta kontinuá su kaptura di turtuga ku reda pa investigashon den e siman ku ta kuminsá promé di ougùstùs.

HASIDÓ DI PAS

“Bendishoná ta esnan ku ta hasi pas, pasobra nan lo wòrdu yamá yunan di Dios.”

Mateo 5:9(BS)

Mi tin sigur ku e palabra mas kodisiá awendia ta pas. Despues di un pandemia ku a hasi hopi daño na mundu, ata awor Rusia tin un guera ku Ukraina. Despues di mas o ménos dos aña awor atrobe otro senario ku ta trese inki-etut mundialmente. E pregunta ta lanta, ki dia nos por ta bibando trankil i na pas?

Konflikto tin tur kaminda, na nivel di nashonnan, organisashonnan, iglesianan, famia i personal. E situashonnan akí ta kita algu masha importante mes den bida, e pas ku tantu nos ta anhelá. Debí ku pas ta un tema asina aktual i nesesario, tin masha konferensia, charla i buki tokante di pas, pero e último lugá ku nos tin e, ta den nos bida.

E pas mas importante ku nos mester tin ta; ‘pas ku Dios’. Romanonan 5:1 ta bisa: “Pesei, siendo hustifiká pa medio di fe, nos tin pas ku Dios dor di nos Señor Jesu- Cristo” Atrabes di e hustifikashon di Kristu, mi por tin pas ku Dios pa medio di fe. Konsekuentemente awor mi ta un agente di pas, pasobra e pas di Dios ta reina den mi kurason. I den situashonnan konfliktivo mi por dil mihó ku nan pasobra mi a konosé na nivel personal; e ‘Prens di Pas’. Si awe bo tin lucha den bo mente, si bo tin situashonnan di hopi strès i tenshon, awor t’e ora pa buska Dios, awor t’e ora pa eksperensia e pas berdadero.

Mi ta un agente di pas, ora ku e pas di Dios ta reina den mi kurason. Randolph Paula

Produksion PGM

Edifisio nobo di Iglesia Evangéliko den fase final

KRALENDIJK – E edificisio nobo di Iglesia Evangéliko na Nort di Saliña ta den fase final. A traha e edificisio aki patras di e iglesia ku pastor Earl Ressler a inaugurar dia 29 di yùli 1956. Pastor Maria, pastor aktual di Mishon Aliansa Evangéliko na Boneiru, algun aña pasá a inisiá ku konstrukshon di e edificisio nobo na Nort di Saliña.

Pastor Maria a splika BONERIANO ku na momentu ku kuminsá usa e edificisio nobo lo ta tene sirbishi ei den, miéntras ku e edificisio aktual di iglesia ta

bai bira lugá di enkuentro pa mucha, na unda lo duna nan instrukshon tokante bida kristian i beibel en general.

Na e momentu aki Mishon Aliansa Evangéliko tin iglesia, aparte di esun di Nort di Saliña, tambe na Rincon i Nikiboko.



Dor di aktitut negligente fuerte di gobièrnu

Un isla bunita ta hundi

KRALENDIJK – Nos no por habri korant òf Facebook ku nos ta lesa ku gobièrnu ta trata ta skonde tras di su fayonan. Pa mensioná algun artíkulo, no òf kasimente no ta mantené nos kamindanan i esaki hopi biaha ta trese un situashon peligroso kuné i dañu innesesario na persona òf vehíkulo. Tampoko no ta asfaltá kaminda ku ya pa mas ku 20 aña mester a asfaltá. Ta traha rotònde pa despues bolbe kibra sin duna bon splikashon ken ta responsabel pa esaki i naturalmente saka plaka konsiderabel pòrnada ku por a hasi mihó uso di dje.

Hotèlnan probablemente for di fayò den komunikashon, por bai di kuater pa sinku piso i gobièrnu ke bende un tereno grandi pa metanan komersial, pero aki tampoko sin ningun splikashon konvisente.

No ta mantené lei

Pero komo trener di kachó i amigu di bestia pa ya di 24 aña, mi mester mira kon gobièrnu ta faya den sigui su propio regulashon ku konsekuensianan katastrofal. Poblashon di Boneiru a krese eksplozivamente último añanan i ainda por sigui krese, pero nan a balotá esaki ku e populashon di kachó tambe ku a krese eksplozivamente, loke ta kousa problema.

E ordenansa di kachó di 1961 a keda remplasá na 1998 dor di un ordenansa insular ku den dje artíkulo nan importante ku mester a usa ya pa hopi tempu, pero pa hopi aña a balotá e problema. Un di e artíkulo nan di mas importante den e ordenansa insular aki ta artíkulo 3.1. Aki den tin pará: ‘Ta prohibí pa doño di kachó pa laga e kachó kana riba kaminda públiko sin supervishon, òf riba kualke tereno aksesibel pa hende’.

E regulashon aki pues ya pa 24 aña ta un echo. Hopi habitante nobo di Boneiru no ta na altura di esaki i ta laga nan kachó kana lòs, tòg ta Boneiru. Pero ta tarea di gobièrnu pa informá e hendenan aki i duna splikashon ku esaki no por segun lei, pero kiko gobièrnu ta hasi. Gobièrnu netamente no ta hasi nada, te na momentu ku realmente tin molèster òf na momentu tin kachó ku un komportashon agresivo, ta aktua dor di tira e kachó mata.

Sanshon

Doñonan di kachó ku ta duna problema no ta haña niun sanshon, miéntras den artíkulo 12.2 di e ordenansa insular tin ku gobièrnu por pasa pa detenshon di e doñonan aki òf por duna but. Te ku dia di awe no a hasi nada.

Lástimamente ku ainda hopi hende ta mira kachó komo algu i si akaso e kachó sali, outo dal’è òf tirá dor di gobièrnu, mesora ta bin un nobo na su lugá.

Gobièrnu tampoko no ta duna informashon ku tin posibilidat pa sterilisá grátis pa asina e populashon di kachó no amplia innesesariamente dor di keda sin mantené lei.

Negligente

Gobièrnu ta negligente, danki Dios tin organisashonnan di bestia i sitionan di akohida, manera Fundashon Kunuku Kavelvers i Asilo di Bestia, ku sin niun interes ta hasi esfuerso, pero kaminda awor nan ta man na kabes i tur e tempu a hala atenshon di gobièrnu ku mester intervení.

Pa hopi aña organisashonnan di bestia, sitionan di akohida, dòkternan, Polis i mi tambe komo DogPartner Bonaire, a sinta den reunionnan pasobra



e tempu aya ya tabatin e problemanan. Sinembargo despues di un tempu Entidad Públiko Boneiru tabata ke trese un notisia pafó ku gobièrnu ya a logra hopi den solushonamentu di e problemanan di e kachónan aki.

Lástimamente e realidad tabata otro, dor di un gobièrnu negligente no a tuma paso konkreto i mas fuerte ainda no a sali for di e konsultanan, pasobra no a traha huntu na un notisia positivo miéntras no a alkansá nada. Naturalmente e organisashonnan di bestia a haña e kulpa i a bisa ku bou di otro nan no por a traha huntu, pero e mester ta kla ku e organisashonnan aki ainda ta traha huntu ku sodó i tambe boluntario miéntras gobièrnu mes no ta hasi nada.

Mester aktua

Entre tantu nos ta den 2022 i dor di bolbe mensioná e problemanan i ku gobièrnu finalmente mester tuma paso, diputado Hennyson Thielman a bisa ku ta bai tuma akshon. Medio mart e diputado a bisa ku na fin di mart ta bai kuminsá un kampaña pa informá e siudadano mas mihó pa loke ta trata e regulashon i mantenshon di lei di esaki.

Sinembargo pa sorpresa di hopi, pero no kompletamente inesperá, no a bin niun kampaña, pero lo mester a instituí un grupo di trabou pa solushoná e

problemanan relashoná ku e problemanan di kachó ku ta kana lòs. Den e grupo di trabou aki no tin esnan ku realmente tin di aber ku esaki, manera organisashonnan di bestia i sitionan di akohida i mi mes tambe ku eksperto di kachó.

Sí ku mashá fanfare Entidad Públiko Boneiru a bini ku un maskota bou di nòmber Wufi i a kologá algun poster riba kua tin pará ku kachó mester keda den kurá di e doño i kabesnan sabí a pensa e lema ‘Bo kachó, bo responsabilidat’. Lástimamente e poster tabata solamente na Hulandes i Papiamentu, pues no na Spañó i Ingles, pa asina tur idioma ta representá.

Nos ta kuater luna mas leu, sentronan di akohida ta man na kabes i no por tuma

Pa: Nobert Tadema
kachó mas i gustosamente ke hasi esaki, no por sigui asina.

Gustosamente mi ke bai den kombersashon ku diputado Thielman pa tuma akshon purá i tin suficiente medida ku for di awor por adaptá sin mester pensa mesora na medidanan di kastigu.

Turista tambe ta mira yunan di kachó bandoná, outo ta trapa kachó i pushi i te asta buriku, esaki ta propaganda di nos gobièrnu ku na soño i no tin wowo pa esaki.

Gobièrnu lanta for di soño, bo ta 100 porshento responsabel dor di bo manejo negligente. Firmá pa Norbert Tadem, trener di kachó i eksperto den komportashon di kachó na DogPartner Bonaire.

Tjin Asjoe ta bai kasa



Lider polítiko di MPB i lider di frakshon di e partido den Konseho Insular, Elvis Tjin Asjoe, ta bai kasa ku Karen Manon Bastiaensen. E seremonia di kasamentu ta tuma lugá dia 4 di ougùstùs.

Ecu Bon Construction B.V.

ta buska

- 1 karpinté

Pa mas inf. tel. 782-2903

Papa Francisco a nombra 3 hende muhé den e Dikasterio pa Obispunan

Pa Almudena Martínez-Bordiú | ACI Prensa

Djarason mainta 13 di yùli Santa Sede a informá tokante nombramentu di 3 hende muhé den e Dikasterio pa Obispunan.

Ta trata di sùr Raffaella Petrini, sekretaria general di e Gobernashon di Estado di e Siudat di Vatikano; Yvonne Reungoat, e superior general di e Hijas de María Auxilia-

dora; i Maria Lia Zervino, presidente di e Union Mundial di Organisashonnan Femenino Katóliko.

Ta pa promé be ku 3 hende muhé ta ser nombrá den e komité pa elegí obispunan den e Dikasterio pa Obispunan, algu ku ya Papa Francisco a informá dia 6 di yùli den un entrevista



Maria Lia Zervino,



sùr Yvonne Reungoat,



sùr Raffaella Petrini

konsedé na Reuters.

Den e entrevista, ku a tuma lugá dia 2 di yùli den Vatikano, Papa Francisco no a identifiká e muhénan ni a bisa ki ora el lo

gioso den òktober 2020.

E Kongregashon pa Obispunan, resientemente a kambia su nòmber pa e Dikasterio pa Obispunan, di

akuerto ku e konstitushon nobo ku ta que sustenta e reforma di Vatikano dor di Papa Francisco.

E konstitushon nobo, tit-

25 kos ku nos ta hasi malu den Misa

i mi Dios', pero esaki ta distraí esnan ku ta hasiendo nan propio adorashon den silencio.

17. No bisa na bos altu: 'Pa medio di djE, huntu kunÉ i den djE...'

E ta parti di e Plegaria Eukaristia i únikamente ta toka esun ku ta presidí e Misa pa bisa esaki.

18. Na ora di terminá e Nos Tata no bisa 'Amèn'

Ora nos ta resa e Nos Tata di manera personal òf den nos gruponan di orashon nos ta kustumbrá di konkluí esaki ku un "Amèn". Esaki ta masha bon, sin embargo, durante Santa Misa ta sosodé algu distinto. E Nos tata ta e úniko orashon ku ta integrá den liturgia komo parti di un orashon mas largu. Pa tal rason no mester bisa "Amèn" na ora di terminá, pues e saserdote ta kontinuá ku e orashon bisando "libra nos Señor di tur malu i duna nos e pas den e dianan akí..."

19. No move di bo lugá pa bai duna pas

Bo mester duna pas únikamente na e esnan ku ta huntu ku bo, no na esnan den otro bankinan. Tampoko probechá pa bai kumindá algun konosí ku bo ta mora den misa.

20. Paga tinu kon bo ta risibí

Pa por risibí bo mester warda ayuno eukarístiko (no a kome òf bebe nada, ni kou bals, un ora promé ku risibí), i no tin piká grave. No bai risibí únikamente den e fila di e saserdote pues Hesus ta presente den e Hostia Konsagrá, sin importá si ta e ta ser duná dor di e saserdote òf un Ministro Ekstraordinario di Sagrada Komunion, ku ta un persona ku a risibí un preparashon spesial, a ser instituí dor di e obispu, i ta konta ku e utorisashon di Iglesia pa parti Komunion den Misa i hib'é na ansianonan i enfermonan.

21. Despues di a risibí, no papia ku otronan

Despues di risibí, regresá na bo lugá i papia mentalmente ku Señor, kua bo a kaba di risibí. Si bo no por a risibí, hasi un Komunion Spiritual i papia kunÉ.

22. Ora kaba ku partimentu di Komunion no sigui kantando

Mester terminá ku kantamentu ku e último persona ku ta risibí, pa duna tempu pa por tin un silencio sagrado ku ta permití kada persona drenta den diálogo ku Dios.

23. No laga bo telefon selular distraí bo

Na ora di yega na iglesia pone bo selular riba silencio. No kuminsá app ni papia ku e selular, pasobra bo ta distraí bo mes i ta distraí otronan. Dedicá tur bo atenshon na Señor, ku ta dedikando tur Su atenshon na abo den e sita di amor akí ku ta e Misa.

24. No deskuidá bo yunan chikí

Siña nan na ta den kas di nan Tata Dios, i sa na komportá.

25. No Sali promé ni meskos ku kon bo a yega

No pèrdè e bendishon ku kua ta manda bo na mundu pa duna testimonio na nòmber di Tata i di Yu i di Spiritu Santu. I sali ku un propósito nobo ku Señor a inspirá den bo, pa edifiká den mundu Su Reino di amor.



kardinal Mario Grech,



Mons. Dra•en Kutleša,



Paul Desmond Tighe

bai anunsiá nan nombramentu ofisialmente. **Na su lugá el a bisa ku e tabata "abrió na duna (e muhénan) un oportunitat" i tabata ke abri e kosnan "un poko".**

Poko dia despues, Santa Sede a hasi e nombramentunan akí ofisial ku ta aña unu mas na esnan ku Papa a informá promé.

Sùr Raffaella Petrini, fransiskano, ta sekretaria general di e Gobernashon di Vatikano for di novèmber 2021, e di dos kargo di e gobièrnu di Estado di Siudat di Vatikano.

Di su parti, e sùr franses **Yvonne Reungoat** tabata superior general di e Hijas de María Auxiliadora.

Remarkabel ta ku e tabata un di e shete promé muhénan den ser nombrá komo miembro di e departamento vatikano pa e órdenan religioso den 2019.

E argentino Maria Lia Zervino ta miembro di e Asociación de Vírgenes Consagradas Servidoras for di su 22 aña. E tabata direktor institushonal di e Komishon Nashonal di Hustisia i Pas di e Konferensia Episkopal Argentino.

E ta ademas presidente di e Union Mundial di Organisashonnan Femenino Katóliko i a ser nombrá dor di Papa Francisco konsehero di e Pontifisio Konseho pa Diálogo Interreli-



Roberto Dotta



José F. Advincula



José Tolentino de Mendonça



Kardinal Anders Arborelius,

ulá Praedicate Evangelium (Prediká e Evangelio), ta establese ku kualkier fiel tambe por dirigí un dikasterio vatikano of otro organismo-nan, "mirando nan kompetensia partikular, poder pa goberná i funshon".

E miembronan di e dikasterio **ta yuda na elegí obispunan di e diósis** i ta analisá e dokumentonan di posishon, ku ta proporshoná un opinion tokante e kandidatonan.

Ademas di e 3 muhénan akí, Papa a nombra Kardinal Anders Arborelius, Obispu di Stockholm (Suecia); José F. Advincula, Arsobispu di Manila (Filipina); José Tolentino de Mendonça, Archivero i Bibliotekario di Santa Iglesia Romano; Mario Grech, Sekretario General di e Sínodo di Obispunan.

Tambe Mons. Dra•en Kutleša, Arsobispu di Split-Makarska (Kroasia); Paul Desmond Tighe, sekretario di e antiguo Konseho Pontifisio di Kultura i Reverendo Roberto Dotta, Abad di e Abadía di San Pablo Extramuros i Administrador Apostóliko di e Abadía Teritorial de Montecassino (Italia).

BWM ta bai hasi mas invershon na Boneiru

A presentá planta nobo i moderno pa produsí asfalt

KRALENDIJK – E kompania BWM, spesialisá den asfaltamentu di kaya awor ta disponé di un planta nobo i moderno pa produsí asfalt. Djaweps atardi, despues ku a transportá e ekiponan di e planta nobo di asfalt pa su sitio, a splika prensa tokante e planta



nobo i super moderno.

Noville Bartelomeo, direktor BWM Infrastructure Bonaire, bisa ku ta bai instalá e planta i masoméno 2 siman òf algu mas, ya por saka asfalt for di e mashin. Lógikamente ta tuma poko tempu pa siña traha ku e aparato asina moderno i si tur kos ta na òrdu promé e bai den uso ofisialmente.

E planta aktual ta saka 30 tòn pa dia. Esaki ta tarda hopi pa por asfaltá kaminanan rápido. Awor, e planta nobo ta 3 biá mas grandi, 90 tòn. Pues por traha mas rápido ku ménos ora di trabou.

Wendel Bonifasio, direktor di e kompania mama na Kòrsou, a papia di e kambio drástiko ku ta bai tuma lugá na Boneiru. “Mi ta enkargá ku e kompanianan i nos mira ta definitivo. Nos ta konbirtiend hopi na Kòrsou. Kumpra diferente kos i hasi invershon grandi. Na Boneiru, kisas nos a invertí ménos

kompará ku Kòrsou. Nos lo bai hasi mas invershon na Boneiru. Pokopoko nos lo trese esakinan den publisidat.”

E planta nobo aki ta un parti chikitu ku BWM Infrastructure a hasi. Un planta super moderno ku a kosta masoméno 2.5 mion dòler. “Pues nos ta atendiendo e kosnan hopi na serio. Momentu bo por invertí, ta ora kos ta kana bon pa loke nos a hasi bon, esta e trabounan. Mas moderno e planta bira, mester di hende ku bon konosementu pa manehá nan tambe. Nos ke hendenan lokal, pa ehersé e trabou na e planta. Boneiru tin un bon pista na aeropuerto, bon prizòn i kayanan ta mehorando i asina nos ta kontinuá, “e direktor general Bonifasio a bisa.

Martijn Zwiers, otro funshonario di BWM, a bisa “Kompará ku loke nos ta usando awor, e nobo ta hopi mas grandi.

Planta aktual ta poko

bieu i mester remplas’é. E planta nobo por drei riba gas i diesel. Por raspa e kamindanan aktual i reusa e asfalt pa e bai bèk riba kaya. E planta tin sistema pa gara stòf, loke ta evitá ku hende den bario ta bai haña problema ku stòf.”

Hende ta bin di eksterior pa duna guia kon e planta mobil aki ta funshoná. Mobil, pasobra e ta fásil pa move di un sitio pa otro si ta nesario.

Preis no ta bai baha pa trahamentu di kaminda na Boneiru ku e planta nobo. Esaki debí ku trahamentu di kaminda tin diferente kos ku ta relatá na dje. Kisas e preis por baha den futuro, pero e ta dependé di hopi kos ku no ta den nos man.

“Tin trabou ta pone hende den komunidad perdè poko pasenshi, pero sa ku semper nos ta hasi e trabou ku bon intenshon i traha mas rápido posibel pa terminá, “ Martijn Zwiers a bisa.





CHANTIWAWA RIBA RÒNDU

Pa' Bòi Antoin

E último simannan aki Chantiwawa ta manera den un resès. No pasobra nos a bai ku fakansi, sino pasobra mi a organisá algun kaminata i ekskurshon riba djadumingu. Entre otro pa un parti chikitu di Bolivia i Fontein. Tambe tabatin e ekskurshon yamá 'Ruta di Katibu'. Esaki tabata den konvoi. E interes tabata grandi.

Djadumingu último m'a bai kana Ruta Wayaká ku algun chantiwawero. Mi kier a kustumbrá ku e ruta mas largu, esta sali na Sabadeco i regresá Sabadeco. Nunka anterior mi a kan'é ku nan. Algun siman pasá m'a kan'é pa promé biá ku mi yunan Franklin i Danielson, nan kasá i amiga, ademas algun invitado.

E idea tabata pa kan'é ku públiko interesá, pero mi a para esei debí na kalor ku tin e dianan aki, loke ta enserá su peligran. Miembronan di Chantiwawa ta kustumbrá ku e kondishonnan aki di wer kaba.

Interesante ta ku durante e kaminata di djadumingu nos a topa riba Ruta Wayaká orkidia ku flor. Hopi bunita.



Bolivia

E siman ku a pasa tabatin basta diskushon despues ku m'a tuma posishon den e asunto di Bolivia. E opinion aki a yega tur kaminda i el a krea basta diskushon adishonal. I esei tabata mi meta.

Sinembargo, mi deseo ta pa bonerianonan (outéntiko) realisá kiko tin na naturalesa den Bolivia. Pa logra esaki, desde ku a bira konosí ku a bende Bolivia ku e grupo di Breemhaar i ku plannan di desaroyo a subi mesa, m'a organisá diferente kaminata den e anterior plantashi aki.

Mi por reklamá mientrastantu di konosé Bolivia hopi bon. Sierto partinan mihó ku otro. E parti ku m'a bishitá promé komo mucha tabata e área di Kibra'i Karati, aktualmente konosí komo Luga' Alehá. Nos (mi



amigunan ku mi) tabata drenta via di e asina yamá 'Kunuku di Nene George', parti sùit di Bolivia, pa kue yuana.

Nos a traha den pasado tres programa Herensia ku Buchi Frans den Bolivia. Nos a kore den pikòp na mas ku un okashon pa bishitá tur parti di Bolivia ku nos por a yega ku otro. Nos a para na diferente sitio pa laga Buchi konta di nan nòmber, loke tabata sosodé na e sitionan aki.. Historia oral.

Toyán

E siman aki nos a bai

Bolivia huntu ku Toyán, yu di Buchi, kende a lanta hopi pegá huntu ku su tata. Mi kier a yega na un sitio spesífiko, yamá 'Tera Blanku'. Emma, lider di proyekto di FuHiKuBo i amiga di mi yu Danielson, tambe a bai ku nos. I Anneke, kamarógrafo, pa inmortalisá e imágennan bunita aki promé ku nan disparsé.

Nos a yega 'Tera Blanku', pero un otro ku unu ku nos di Chantiwawa a bishitá aña pasá, pero ku mi no por a yega bèk. Esun ku nos a bishitá anteriormente ta keda mas pa sùit



ku esun na unda Toyan a hiba nos. Pero nan parse otro sí. Pues tin mas ku un 'Tera Blanku'. Nos lo sigui eksplorá.

Toyán tin hopi konosementu di Bolivia. E konosé sitionan markante, kueba, pos, palunan spesial, etc. Tambe topografia di Bolivia. Den Bolivia tin hopi sitio ku nan propio nòmber, manera Kibra'i Karati, Kunuku di Maishi, Klep di Chancha (Chanchi), Waykano...

Mi ta bai trata pa hasi mas grabashon den Bolivia. Lo mi ke trese imágenan di e bunita teritorio aki den boso kas. I kere mi, no ta un 'kaalgevreten gebied door geiten', manera makambanan ke laga nos kere. Mi no ta aseptá e ekspreshonnan deningrante i humiante aki pa nos naturalesa. Asta si tabata asina, asta den e 'kaalgevreten gebied' aki tin bunita. Meskos ku tin 'bunitesa den sekura', ku ta título di un buki skirbí pa frater Arnoldo Broeders.



Detenshon pa destrukshon

KRALENDIJK -- Den oranan di anochi dia djaweps 21 di yùli, a drenta notifikashon na Sentral di Polis tokante un hòmber ku tabata kana ku un kuchú na su man i ku tabata skòp vehikulonan riba Malekon na Kaya Kachi Craane.

Un patruya ku mesora a yega na e sitio, enbèrdat a

topa ku e hòmber aki ku un kuchú na su man. E hòmber tabata mustra komportamentu agresivo. A dun'é vários òrdu pa laga e kuchú kai. El a duna oido na esaki, pero mesora kue posishon di bringa.

Polis a detené e hòmber di inicial E.M.H. di 37 aña di edat.

IMÁGENAN DI NOS PASADO - BEELDEN UIT ONS VERLEDEN

Urna elektoral na Playa



Stemlokaal in Playa



MONCHI & TONCHI

Tonchi, nan di asphalt a kuminsá lora, pero ta parse den Rincon so e ta lora.

Ya Monchi, bo mes sa aña ta bai bòltu i mester drecha wes'i lomba di partido.



KOLOFÓN
Editor Bonaire
Communication
Services N.V.
Kaya Irlanda 12,
Tel. 717-8482

E-mail:
extrabon@gmail.com
Wèpsait:
www.extraboneiru.com

Direktor
Shirley Martis
785-3824
796-3824

Hefe di redakshon
Bòl Antoin
786-6818

Redakshon
Armand 'Papi' Antoin
Davienuska Janga
Velli Gijbertha
Nathaly Evertsz
Edson Pietersz

Ibi Piar (deporte)

Partner na Aruba
Awe Mainta

Partner na Kòrsou
Extra

Layout
Davienuska Janga
Gairo Frans

Aviso
avisobon@gmail.com

STATIA/SABA/ST. MAARTEN

Pèrmit otorgá pa haf nobo

SABA – A logra un paso importante anteriormente e siman aki momentu ku Rijkswaterstaat di Hulanda a otorgá e pèrmit pidí pa konstrukshon di e haf nobo na Black Rocks.

E pakete total ta kontené e pedida di e pèrmitnan di konstrukshon nesasario, inkluyendo e dokumentashon ku tin mester a atkerí e pèrmitnan, manera e prosedura di impakto ambiental, prosedura arkeológiko i prosedura siguri-

dat di nabegashon.

Rijkswaterstaat lo bai risibí i disidí riba un petishon pa pèrmit den e lunanan ku ta bini. A tene konsulta ku e partnernan lokal pa preparashon di e pèrmit. Pronto ta bai organisá un enkuentro pa informá komunidat tokante e proyekto di haf i e último desaroyonan.

Prosedura di oferta

E siguiente paso lo ta preparashon di e oferta,

loke ta proyektá pa e promé kuartal di 2023. Manager di e proyekto di haf, Mario Prak i konsehero di pólisa di haf, Zelda Meeuwsen, ta biahando pa Hulanda pa tene konsulta di merkadeo ku un kantidat di kontratista di Hulanda, Bèlgika i Dinamarka, spesialisá den konstrukshon marítimo.

E tim di proyekto ya tabatin konsulta ku kontratista karibense i di Estádos Unídos. Kontratistanan lokal lo bai hasi mas tantu trabou posibel den e proyekto di haf. E trabounan ku ta rekerí sierto ekspertesie ku no ta disponibel lokalmente, lo keda hasí pa kontratistanan djafó.

Trabou di reparashon

Komo parti di e proyekto di haf, lo hasi invershon

den Fort Bay Harbor aktual, loke lo bai keda designá komo fasilidat di karga una bes e haf nobo na Black Rocks ta kla.

E promé trabounan di reparashon na e waf prinsipal i rampa Ro-Ro, meskos tambe ponementu di bolder i fènder nobo, lo kuminsá promé ku fin di 2022. E trabounan aki ta na enkargo di kontratistanan lokal.

Re-vegetashon

E konstrukshon di kaminda pa e haf nobo ta bai bira mas bèrdè ku plantamentu di palunan di fruta. E departamentu di agrikultura, konsehá pa Jim Garza di Gezondheid Farms, a planta komo 40 palu di koko i drùif banda di e kaminda konstruí. Tambe lo pone un sistema di iri-

gashon. E re-vegetashon lo yuda mitigá eroshon. Re-vegetashon ta un parti integral di e proyekto di Haf.

Eksperensia

E tim di e proyekto di haf resientemente a keda reforsá ku Mario Prak. E manager di proyekto nobo tin eksperensia di trabou amplio den e sektor di konstrukshon marino, industria di kobamentu i maneho di proyekto. El a traha den diferente pais rònt mundu, inkluyendo Oustralia, Hong Kong, Singapur, Filipina, India, Sur Afrika i Tanzania. Prak su último trabou promé ku el a yega Saba, tabata trabou di konsehero i supervishon di kitamentu di restu di barku bieu den Simpson Bay Lagoon na St. Maarten.



Palunan di koko i drùif yòn banda di konstrukshon di e kaminda pa bai e haf nobo na Black Rocks.

Mediadónan krítiko riba ròl di Hulanda

STATIA – Mediadónan Maria Liberia i Suzy Camelia, ta krítiko tokante e resultadonan di e intervenshon dor di Den Haag na St. Eustatius.

Apesar di su forsa finansiero i hopi eksperto, gobièrnu di Reino no a

logra pa solushoná e fayò konstatá kompletamente, e mediadónan ta skirbi den nan relato.

E mediadónan ta krítiko tambe tokante e aserkamentu aktual di gobièrnu pa loke ta trata rekuperashon di demokrasia lokal.

E tim di mediadó ta di opinion ku a bira tempu pa Hulanda laga e deskonfiansa ku tabatin na 2018 un banda i atendé ku un deskonfiansa algu mas grandi pa e deseo i e poblashon di St. Eustatius pa rekobrá su demokrasia na 2023.



Minister Xiomara Maduro di Finansa:

Gobierno ta respeta e derecho constitucional di Parlamento

ORANJESTAD -- Minister di Finansa a menciona den e conferencia di prensa cu Ministro Presidente a splica e situacion di Pais Aruba na Secretario di Estado, pero cu Hulanda

no ta comparti e mesun opinion di Aruba y ta insisti pa cambia e ley di LNT bek na Parlamento. Gobierno di Aruba ta di opinion cu esaki ta contra di e principionan democratico di un pais.

Ademas den gobierno su bista e ley manera presenta y amenda ta carga e principio di e ley. Na Aruba ta mas o menos 7 persona ta gana mas cu e suma den e ley y cu ley awo nan tin 5

aña pa adapta, locual ta un periodo rasonabel .

Awo cu e ley a pasa, e trayecto a cuminsa tambe pa e personanan aki yega na locual ta poni den ley. Esaki ta haci cu tambe cu

tin regla y no por tin abuso awo pa dilanti. Pa e motibo aki Gobierno di Aruba no por cumpli cu e peticion di Hulanda pa exigí of acerca Parlamento pa nan cambia locual nan a amenda.

No obstante diferencia di opinion cu por tin

Gobierno ta asumi su responsabilidad pa cumpli cu e empleado publico

ORANJESTAD -- Minister President a anuncia for di Hulanda cu tin un diferencia di opinion entre Aruba y Hulanda riba e condicionnan pa paga e 5% bek pa e empleado publico por cobra 100% di nan salario. Despues di a delibera cu Consejo di Minister, a dicidi pa no obstante e diferencia di opinion cu por tin Gobierno ta asumi su responsabilidad pa cumpli cu e empleado publico y ta bay over pa paga e 5% manera a keda aproba den Presupuesto 2022.

Gobierno di Aruba ta opinion cu Aruba ta cumpli

cu e tres condicionnan poni pa Consejo di Minister di Reino pa Aruba por paga bek e 5% di recorte den salario di e empleado publico. E pago aki ta presupuesta den Presupuesto 2022 y gobierno di Aruba a muestra Caft con lo bay cubri esakinan, esta cual ta e fondonan cu ta destina pa por paga esaki y den opinion di gobierno esaki ta cubri. Ademas gobierno a presenta na Parlamento di Aruba, e proyecto di Ley di LNT conforme e palabracionnan haci cu Hulanda. Tambe a mantene e recorte di 25% di e salario di e Parlamentario- y Mi-

nisternan.

Pa locual ta e cambionan cu Parlamento a haci den e ley di LNT, Minister Maduro ta splica cu nan ta legitimo y husto. Parlamento den cuadro di nan autoridad a bin cu un amienda den esaki cual ta basa riba dos punto. E prome punto ta e periodo cu por reduci e salarionan di esnan cu ta gana mas cu e norma. Esaki a bira 5 aña en bes di 2 aña conforme e consehonan di Raad van Advies y e Comision di Corporate Governance. Segun Minister Maduro, e cambionan aki ta wordo haci conforme

e consehonan cu tin riba e ley aki. E di dos punto ta e suma di 130% di e salario di Minister President a ser adapta di 261 mil florin pa 329 mil florin, cual ta e suma sin recorte. Mirando cu e 261 mil florin tabata basa riba e salario di Minister President reduci cu 25%. Minister di Finansa ta indica cu e recortenan 5% y 25% ta transitorio y no tabata e intencion pa esaki keda pa semper. Pa e motibo aki Gobierno a bay over na paga e 5% y den Presupuesto 2023 lo pone locual falta di e 12.6% pa wordo paga bek pasobra nos tin cu bay como Pais na normalidad. Parlamento na un manera husto a haci e cambionan aki, pasobra mester tuma como punto di salida e normalidad. Parlamento di su banda a splica riba e dos cambionan y Gobierno di su banda ta di opinion cu e cambionan haci pa Parlamento di Aruba, no ta mi-shi cu e principio di e ley. E ley a pasa na Parlamento, Gobernador a firma y awor Aruba tin un ley cu ta regula cu no tin salarionan hopi halto na Aruba.

Minister Maduro ta splica cu Gobierno di Aruba tin cu respeta e derecho con-

stitucional di Parlamento pa haci cambionan den ley. Esaki ta mesun derecho cu ta conta tambe pa otronan den Reino, manera Tweede Kamer cu tambe tin derecho pa haci cambio den ley. Ningun hende ta para riba e derecho constitucional di nos Pais. Gobierno di Aruba no por cumpli cu Hulanda pa pidi Parlamento pa haci cambio na amienda cu Parlamento a haci den e ley di LNT. Gobierno simplemente no por para riba e derecho constitucional di Parlamento pa haci cambio na un ley via nan derecho di amienda.

Desde mei 2020, e aparato gubernamental, semi-publico y fundacionnan tabata solidario y a haci e sacrificio cu e recorte necesario di 12.6%. Gobierno di Aruba a bin ta haci tur locual ta na su alcance pa haci e pago di e 5% bek. Gobierno ta asumi su responsabilidad y ta tene cuenta cu e realidad cu tin un guerra na Ucrania cu tin su efecto pa Aruba tambe na unda costo di bida ta bira mas caro. E situacion aki ta pone cu e pago di 5% di e recorte na empleado publico, semi-publico y na fundacionnan ta hustifica.



ARUBA

Minister Oduber ta manda felicitacion na e 28 empleadonan di Divi Resort

ORANJESTAD – Di aranson anochi a tuma lugar un ceremonia den e ballroom di Alhambra caminda a duna reconocimento na 28 empleado di Divi Resort. Aki e Director General di Divi & Tamarijn Sr. Marin Bijl a haci e entrega na su empleadonan.

E trahadornan aki a cumpli nan aniversario den e segundo cuartal di

aña 2022. Minister Oduber no tabata por ta presente pero manera semper Ministerio di Turismo y Salud Publico tambe ta presenta nos plakaat pa asina duna nos trahadornan den hospitalidad nan reconocimento mereci.

E 28 empleadonan aki ta traha den diferente area y diferente resort di Divi.

Un pabien sigur na sra.

Emelinda Tromp y sr. Jorge Lugo cu ambos a cumpli 45 aña di Aniversario, esaki sigur ta di aplaudi. Emelinda a cuminsa traha Room Attendant den e compania na 6 di mei aña 1977, e tempo ey Emelinda tabata tin 17 aña di edad. Jorge a cuminsa su trayectoria na 24 di juni aña 1977 trahando como Houseman. Despues Jorge a traha como

busboy, waiter, captain y desde 1989 como F&B supervisor.

Divi Resort a habri su porta na Aruba den aña 1969 bou di e nomber Divi Aruba y awe tin 5 resort di Divi na Aruba. Hopi importante pa bisa ta cu 3 di e 5 resort nan aki ta di Timeshare. A keda demostra cu propietarionan di Timeshare ta cu Aruba den bon y den malo.

1. Divi Dutch Village Resort
2. Divi Aruba Phoenix Beach Resort
3. Divi Village Golf and Beach Resort
4. Divi Aruba All

Inclusive Resort

5. Divi Tamarijn All inclusive Resort

Minister Dangui Oduber ta manda palabranan di felicitacion y aprecio na tur e empleadonan di Divi Resort. Cada un di bosonan ta contribui grandemente cu e sector turistico, brindando servicicionan di calidad na nos bishitantenan. Minister Oduber ta bay sigui brinda e tipo di reconocimentonan aki na nos embahadornan turistico, paso nan ta e weso di lomba di e industria importante aki.

Turismo ta nos unico pilar economico y ta e driver di nos economia.



A cumpli cu condicionnan di Consejo di Minister di Reino

ORANJESTAD -- Na opinion di Gobierno, Pais Aruba a cumpli cu e 3 condicionnan pa paga bek e recorte di 5% na empleadonan publico, semi-publico y di fundacionnan asina Minister di Finansa a informa durante e conferencia di prensa extraordinario di Gobierno di Aruba. Gobierno a presu- puesta e pago den Presupuesto 2022, Parlamento a pasa e Ley di LNT y e salario di politico a keda corta cu 25%.

Gobierno di Aruba a haci tur local ta na su alcance pa keda cla y haci e pago bek.

Como Pais nos ta conveni cu nos a haci tur local ta posibel pa cumpli cu Hulanda, pero na final si no tin oido pa esey, Gobierno di Aruba mester carga su responsabilidad propio segun Minister di Finansa Xiomara Maduro.

Despues di analisa e situacion Consejo di Minister a tuma e decision despues di a considera tur e

puntonan menciona.

No ta hustifica y desproporcional pa mas cu 5000 mama y tata di famia, nan entrada keda reduci den bista di e realidad.

Gobierno a bay over na paga e 5% y den Presupuesto 2023 lo pone local falta di e 12.6% pa wordo paga bek pasobra nos tin cu bay como Pais bek na normalidad segun e mandatario encarga cu Finansa Publico di nos Pais Aruba.



Everon Vrutaal a titulá kampion den karate na Trinidad ganando 8-2 i 9-1

KRALENDIJK--E karateka Everon Vrutaal tabata grandi den karate na Trinidad siman pasá.

T'asina ku siman pasá djabièrnè dia 15 di yùli 2022, di akuerdo ku e karateka Everon Vrutaal, e la sali pa Kòrsou i su manisé mes sigui pa Trinidad.

E siguiente dia mes e peleanan a kuminsá aya na

Trinidad.

E promé dia di pelea a bai na su banda segun Everon Vrutaal a bisa.

Na Trinidad no tabatin oportunidat di prepará mes pa pelea, tabata yega drumi lanta i kuminsá ku pelea.

Na Trinidad di akuerdo ku Everon, e la bringa dos pelea.

Su promé pelea tabata

kontra un karateka di Trinidad mes pa despues e topa ku karateka di Honduras.

E promé pelea e la gana 9-1 anto e di dos i último pelea e la gana ku skor di 8-2, tur dos konvinsentementamente pues.

E la skor 2 punto riba Everon, ku a skor 8 punto riba dje.

Riba nos pregunta Everon a bisa ku e la gana e peleanan bon.

Mas aleu Everon a bisa ku e ta un karateka ku no tin kunen ku e sali kampion pero sèmpèr e ke "perform" su mes di mas mihó posibel.

E karateka mes ku e la gana, su "performance" ta hopi haltu.

Asina e ke sigui pa subi su nivel.

Ke men si e la pèrdè mes, e ke pa su "performance" ta haltu.

Aworakí esaki a subi esaki mas, segun Everon a bisa.

Mas aleu pa loke ta e peleanan, e la traha ku e dos kontrinkantenan sigur den e peleanan.

E ta sigui trein pasó su nivel tin ku sigui subi mas.

Segun Everon, tin karatekanan di 35 aña ku ta gainan tòp ku ainda ta bringa karate.

Nan kondishon ta manera un gai di 18 aña.

Tabata Everon so ku lo mester a realisá e biahe sin su coach ku mester a sali ku fakansi.

A aserka e delegashon di Kòrsou pa por biaha huntu ku nan, loke nan a asepta tambe.

E coach di Kòrsou Sensei Lucia a yuda Everon komo coach na Trinidad.

Ke men ku Kòrsou a yuda Everon hopi bon den esaki komo su coach.

Everon ta kontentu ku e por a konta ku e coach di Kòrsou, ya ku e la logra lokual ku e la logra ku e



peleanan, esta ganando tur dos pelea ku skornan di 9-1 i 8-2.

Mas aleu riba nos pregunta, e promé karateka ku ela bringa kuné ta riba 30 aña kaba, segun Everon a bisa.

Ku e promé e la yega di bringa kuné un biá kaba.

Tambe everon a bisa ku e promé biá ku e la bringa ku e karateka di Trinidad, e tabatin e pelea ganá 9-2.

Esaki tabata na aña 2018 den final di Karibe, unda ku si bo gana ta kampion di Karibe bo ta.

Algu a bai robes ku e rèfri a deskualifiké.

E tabata ganá pero rèfri a deskualifiké i su kontrinkante a bai ku e medaya di oro.

Segun Everon, momentu ku e la topa ku e karateka aki bèk, e tabatin hamber di dje. E la bisa sèmpèr si ku e tin ku topa ku e karateka aki un bia mas, loke a sosodé tambe siman pasá.

E la bai su lugá, su pais i gané, anto gané bon tambe ku skor di 9-1, loke por poko tabata 9-0. Everon tabatin hamber di dje pasó

e no por bai ku su medaya di oro zomaar, loke bo no a bringa p'e, haña esaki komo regalo.

Fin di siman pasá Everon a bolbe topa kuné i bolbe gané.

Nos a puntra tambe na Everon ku e último pelea kontra e karateka di Honduras, kon a bai ku e pelea aki.

Su kontesta tabata ku e pelea aki tambe a bai bon, loke ta reflehá tambe den e resultado di 8-2.

E promé pelea di e kontrinkante aki ku USA, e la mira kon e la rebusak e karateka aki.

Kontra e karateka aki den final e no a duna e karateka aki niun chèns.

Manera rèfri a duna señaal e la hasi e trabou ku e mester a hasi i gana e pelea.

Everon no a duné chèns di reashoná i gana e pelea, pa asina sali ku dos viktoria konvinsentementamente fo'i dos pelea titulando kampion di su kategoria siman pasá na Trinidad.

Nos ta felisitá karateka Everon Vrutaal un bia mas ku e logro aki.

DEPORTE

A bai bon ku nos kanadónan den “vierdaagse”

KRALENDIJK--Ayer a bai bon ku nos kanadónan di “vierdaagse” di Nijmegen, por sierto e último dia di e kaminata pa e aña aki.

Awe Nazario Alberto I Ròy Martines a drenta na final di e kaminata 12:30.

Na final despues di a

drenta na final, a risibí nan “pin” di e “vierdaagse” 2022.

Nazario a risibí su “pin” 17 i Ròy di 16,

Den kontakto ku nan ayera mainta por a komprondé ku e último dia di e “vierdaagse” di Nijmegen a

bai bon danki na Dios.

Tabata un dia fresku sin solo pa nan tur por a logra esaki.

Ku esaki Nazario i Ròy a logra un bia mas na kana e kaminata anual aki di Nijmegen.

Nos ta felisità nan pa un biá mas a logra kana e kaminata dje aña aki ku tabata solamente unu di 3 dia i no di 4 dia debí na e ola di calor e dianan tras di lomba.

Riba potrèntan por mira Nazario i Ròy na final di e “vierdaagse” ayera mainta ku bandera di Boneiru, tambe momentu ku nan a risibí nan “pin” for di mannan di un di e organisadónan.



Di 16 pa 18 desèmber 2022

Cazova Beach Volly U-23 pa promé biá na Boneiru

KRALENDIJK--Dia 21 di yùli 2022, BoVoBo representando Boneiru den reunion di direktiva di Cazova, a konfirmá ku Cazova Beach Volly U-23 pa promé biá lo tuma lugá na Boneiru di 16 pa 18 di desèmber 2022.

Tambe BoVoBo a konfirmá partisipashon di un ekipo maskulino U-23

pa partisipá den 2 di e 10 kompetensianan di Norceca Beach Volleyball Tour 2022, ku lo tuma lugá na Santo Domingo.

BoVoBo tabata hasiendo e trámitenan pa partisipá na e U-23 di Cazova Beach Tour 2022 ku lo tuma lugá na Aruba, tambe pa promé biá, esaki den luna di òktober.

BoVoBo ta sigui traha pa adelanto di vòlibòl di Boneiru.

Esaki di akuerdo ku informashonnan di BoVoBo ku nos a risibí tokante esaki e siman aki.

Ku esaki ta konstatá ku tin trabounan tumando lugá pa adelanto di e deporte di vòlibòl di nos isla.

Éksito..




Mucha muhé boneriano pèrdí na Europa

KRALENDIJK -- For di djasabra 16 di yùli a drenta notifikashon ku e mucha muhé Wendelin Shiga Mercelina di 16 aña, ta pèrdí na Europa.

Dia promé di yùli el a sali rumbo pa Oropa i mes- ter a regresá 15 di yùli, pero

te ku awe no a regresá ni sa su paradero.

Polis ta pidi un i tur ku por a tende, mira òf ku sa paradero di Wendelin pa tuma kontakto mesora ku polis via +599-715-8000, 9310, òf via meil na politie@politiecn.com



Van Huffelen:

“Kòrsou ta duna gratifikashon sin aprobashon di RMR”

WILLEMSTAD.- Segun sekretario di estado Alexandra van Huffelen (Relashonnan di Reino) Kòrsou no a haña un konseho positivo di Kolegio Supervishon Finansiero (Cft) pa paga gratifikashon di 1750 Naf pa ántenarnan. Tampoko nan a haña aprobashon di Konseho di Minister di Reino (RMR) pa hasi esei. Ku esaki Kòrsou ta aktuá kontra reglanan di RMR. Esaki tambe ta konta pa Sint Maarten, ku a opta pa paga ántenarnan sèn di

fakansi. Esaki ta tuma lugá tambe sin konseho positivo di Cft i sin aprobashon di RMR. Esaki Van Huffelen ta skirbi dia 21 di yüli den un karta pa parlamento Hulandes.

Van Huffelen no ta mensioná si esaki por tin konsekuensia. Den su karta e ta informá parlamento di Hulanda tokante sosten di likides pa e tres pais Karibense di Reino Hulandes den e tres kuartal di 2022.

Manera ta konosí Kòrsou pa henter 2022 no a

pidi sosten di likides. Aruba a pidi 4 mion Naf pa e tres kuartal i Sint Maarten 14 mion. Pa e dos pais RMR a opta pa wanta e pagamentu.

Relashoná ku kòrtamentu di 12.5 porshento riba kondishonnan di trabou pa ántenarnan, Van Huffelen ta bisa ku e tres pais Karibense di Reino Hulandes tin oportunitat pa kita e kòrtamentu. Pero esaki tin ku tuma lugá bou di sierto kondishon ku RMR a stipulá i no ku sèn di sosten likides.



Kaimannan ta bon sigurá

WILLEMSTAD.- Ta algun luna kaba ku un kaiman a hui for di e parke di abestrus i a kousa pániko. A logra pone man bèk riba e animal i a hib’e bèk e parke. Pero promé ku esei mester a drecha e kurá den kual e kaiman aki huntu ku otro mas ta kedando. Resientemente a bai inspeksioná e

kurá ku su pisina kaminda e kaimannan ta kedando na e parke di Abestrus i tur kos ta bon sigurá.

E fotonan ta duna un bista ku e kaimannan tei komo un punto di atrakshon na e parke pero nan no ta kousa niun peliger i tampoko por hui pasobra nan kura ta bon sigurá.



Muryad de Bruin nombrá ‘Counterpart Statutair Directeur’ pa CTB

WILLEMSTAD.- Resientemente Hunta di Supervishon di Curaçao Tourism Development Foundation (CTDF) a enkaminá un proseso pa selekshoná un Counterpart Statutair Directeur pa Ofisina di Turismo di Kòrsou (CTB). For di e proseso aki sr. Muryad de Bruin a keda selektá komo e kandidato pa okupá e funshon aki entrante 1e di yüli 2022.

Sr. de Bruin ya ta forma parti di e tim di CTB i te



ku resien tabata okupá e funshon di Regional Man-

ager Europe. Durante e fase transitorio, pa sr. de Bruin bin establese bèk na Kòrsou e lo keda enkargá tambe ku e funshon di Regional Manager Europe te na momento ku selekshoná un kandidato nobo pa okupá e funshon aki.

Sr. de Bruin tin amplio eksperensia den sektor di turismo kual sigur lo ta di benefisio pa su funshon nobo pa asina kontribuí na kresementu di nos industria di turismo.

Rapòrt Tip di gobièrnu merikano

WILLEMSTAD – Gobièrnu di Kòrsou a tuma nota ku Merka a baha e klasifikashon di Kòrsou na

rango 3 pa loke ta trata kombatinentu di trafikashon di hende. Gobièrnu di Kòrsou ta lamentá esaki i ta di opi-

nion ku e degradashon no ta ilustrá e tantísimo esfuersonan ku gobièrnu a bin ta hasi pa kombati trafikashon di personanan. Ehèmpelnan di esaki ta inkluí vários sesion di entrenamentu, reunionnan i kampañanan di konsientisashon ku a bin ta tuma lugá e último añanan pa kombati trafikashon humano.

Gobièrnu ke suprayá tambe diferente proceduranan legal andando kual ta demostrá e esfuerso

inkansabel pa kombati e fenómeno ya mensioná. Gobièrnu tin atenshon pa e severidat di trafikashon humano i ta komprometé su mes pa kombati esaki. No opstante esaki algun di e rekomendashonnan hasi den e rapòrt ta bai en kontra di Kòrsou su estado di derechi manera por ehèmpel trias polítika.

Echo ta ku gobièrnu ta konfrontando k’un situashon finansiero no muchu alentador i e situashon

geopolítico di Venezuela kual ta hasi e fluho di indokumentadonan aún mas grandi.

Organisashonnan kriminal naturalmente ta hasi uso di e situashon prekario aki pa trafiká personanan.

Gobièrnu di Kòrsou lo bai sigui desaroyá maneho i planesnan pa sigui kombati trafikashon di hende i ta konvensi ku a korto plaso gobièrnu Merikano lo subnos klasifikashon riba e lista di TIP.



PÁGINA REKREATIVO



Sera konosí ku.....

Selisah Agostien

Selisah tin 11 añ di edat i e ta bishi-ta Skol Amplio Papa Cornes. El a bai over ku un bunita rapòrt pa grupo 8. Por bisa ku Selisah ta un mini empresario. No mester asombrá niun hende, si mira ku su mami tambe ta un empresario. Den kaso di Selisah e ta traha i bende kùpcake.

" Mi tabata wak i tèst hopi reseta for di entre otro google, youtube i instagram. Porfin mi a haña unu i esei mi ta uza te ku awor." Selisah ta haña yudansa di su mami spesialmente ora e tin ku traha kùpcake ku tin alkohòl. " Mi ta mucha


i mi no ta mishi ku alko-hòl, pues mami ta bash'e pa mi i e ta purba si e tin bon smak." Strow-beri, vania, chukulati i pistacho ta e sabornan ku e ta traha. E sab-or mas gusta ta vania i chukulati. Selisah mes ta gran amante di chukulati

Ora e tin pedido den siman , e ta yega for di skol baña i bisti algu ku e por susha. E ta bisti su skorchi i ta kuminsá ku su preparashonan. Su palabrashon ku mami ta pa e pedidonan no strob'e ku su kosnan di skol. Selisah ta gran fanátiko tambe di programanan di mucha merikano manera `Kids Baking Champion`. Un kos si, e trahamentu



di kùpcake ta keda un hobi.

Selisah tin un mensahe pa e otro muchanan ku tin miedu òf duda di kuminsá ku un hòbi; " Nunka no duda pa hasi algu positivo i semper kere den bo mes i buska sosten di bo mayornan.



‘Dal kore bai’

KRALENDIJK -- den un otro outo ku tabata stashoná na un kas situá na Kaya Amazona i a sigui kore bai.

Un testigu a mira ken a kometé e akto aki i a mèldu esaki.

Un patruya a topa ku e outo ku a kometé e delito na Kaya Kitara.

A hiba e outo Warda di Polis pa mas investigashon.

Plantamentu pal'i mangel

KRALENDIJK – Selebrando Dia Mundial di Pal'i Mangel, Mangrove Maniacs ta bai planta pal'i mangel na Kabayé disfrutá di bahada di solo na e sitio speshal aki.

bin ku pasapalu, abo por bin ku bo stul i bibida preferí. Laga nos disfrutá i pasa un ratu ameno ku otro.

Ta bai planta 400 pal'i mangel chikitu ku a kultivá den kriadero, djamars 26 di yüli pa 5'or di atardi un tiki

pa sùit di Kabayé na Saliña.

E proyekto aki ta ku sostené pa EU International Partnerships 2.0+.

Pa mas informacón por bishita nan website: www.best2plus.org



Mientra Hanoeman pa promé bia na Boneiru

KRALENDIJK -- Pa promé bia Mientre Hanoeman a bishitá Boneiru i el a gusta mashá. Pa korona obra, el a eksperensia e selebrashon di 31 aña di Fundashon Wegá di Number Boneiru, loke tabata un tremendo fiesta pe.

haña e tipo di músika, loke nos ta yama krioyo, pe masha interesante.

E no a balia, sí el a move su kurpa ku e zonido di kantikanan.

Mirando kuantu el a gusta e músika krioyo, por spera pronto e ta bai siña kon ta move riba e ritmo aki korektamente.



Summer

32" HD SMART TV
\$325



JBL SOUND BAR W/ androidtv
\$375

NINTENDO SWITCH OLED
\$499



PS5 CONSOLES, CONTROLLERS & ACCESORIES



City Shop

Smart shopping ▶ Better living

Kaya International #36
 +599 717.36.66

www.cityshopbonaire.com
info@cityshopbonaire.com

City Shop Bonaire
 +599 700.64.42